



UKA 2018/165
8. november 2018
Aqqaluk Heilmann

Nuna tamakkerlugu kulturikkut kingornussarsiat suussusiinik aalajangersaasussanik UPA2019-mut suleqatigiissitaliornissaannik kulturikkullu kingornussarsiat kingusinnerpaamik 2021-mi saqqummiutassatut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Mimi Karlsen, Inuit Ataqatigiit)

Aap, kulturitoqarput tammatsaalissavarput eriagisassaralugulu. Aap, kulturerput pingaartipparput ineriartortissallugulu. Kiisalu, aap, kulturerput inuiaassutsitsinnut pingaaruteqarpoq. Qanorsuarluunniilli taakku uteqattaartuaraluarutsigit kulturi pingaarnerulernaviangilaq, tigussaasumik aalajangertoqartinnagu. Taamaattorli allagaannakkut kulturikkut pingaartitagut allattorsimalerpata apeqquusernartipparput sumut atussanerlutigit.

Atassummiit neriutitigivarput uani siunnersuutigineqartoq pillugu oqallinnitsinni kulturip pingaaruteqassusia eqqartornatigu, taasissutissartaa eqqartussagipput.

Uani siunnersuutigineqarpoq kulturikkut kingornussarsiat suussusii pisortatigoortumik allatorneqassasut. Danmarkimi kultur kanon qivialaaraanni takuneqarsinnaapput assersuutigalugit Ph lampe, Matador aamma Kald det kærlighed. Eqqarsarnangitsuunngilaq nunatsinni suut allatorneqarsinnaassanersut, kiisalu taakku allattorsimaleriarpata qanoq iluaqutigisinnaalissanerigit.

Tassani allattorsimaffimmi allakkutsigu, Kalaallit qajaat. Nalunngikkaluarlutigu eriagisassaralugu kulturitsinnut pingaarutilik, tassani allattorsimaleriarpat qanoq atussavarput? Aamma assersuutigalugu qimusseq. Immaqaluunniit *Tassuunaqqunnerit tamaasa* allattorsimaffimmi ilanngunneqarsimassappat qanoq inuiattut kulturikkut pisuunnguallassutigissavarput? Naak ilutsinni nalunngereerivut qanoq sunniutaat annertutiginersog.

Allat eqqarsaatigeriarutsigit kulturitoqqatsinnut tunngasut immaqqa qangaa oqaatsit, immaqaluunniit suugaluarpataluunniit allat tammalersutut oqaatigineqarsinnaasut. Immaqqa pitsaanerussagalarpoq tammatsaaliinikkut atuakkiaralugit, ilinniartitaanitsinnut atugassiaralugit. Pingaartumik kulturitoqqatsinnut tunngassutillit. Atuakkiarineqareersimangippata.

Siunnersuuteqartup siunertarigunarpaa kulturitsinni pingaartitavut tammatsaalillugit allatorneqassasut. Nunatsinni nunattalu avataaniit takuneqarsinnaalersillugit. Immaqaluunniit ineriartupiloornitsinni nunarsuarmiooqataanerullu anneruleralluttuinnarnerani kulturitoqarput tammatsaalissallugu. Massakkummi kulturerput nutaaliartalik, ineriartortuortoq,



allanngorartuarterlu? Tassunga tunngatillugu tulluorsorinngilarput allattukkatut piffissartorfigalugu, aningaasarpassuarnik atuiffigalugulu pissasugut.

Siunnersuuteqartup tammatsaaliinissamik oqariartuuteqarnera, ilinniusiornikkullu oqaluttuarisaanikkullu annertusaanissamik siunertaqarnera paasisinnaalluarparput. Kulturerput kulturitoqarpullu pillugit tigussaasunik ineriartortitsisunik periarfissiisunillu allarpassuarni suleqataarusuppugut. Kisiannili kultur kanon-itut suliarineqartussanngorlugit siunnersuuteqarnera Atassummiit itigartipparput.